

Date – 02/06/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Chief Minister chuan chak zawka ruihhlo do a nih theih nan sawrkarin òan a la dawn tih a sawi.
2. School Education Minister Dr. Vanlalhlana'n SEDP zirtirtu aia tam zirtirtu lak an nih tur thu a sawi.
3. Lok Sabha inthlan thawh 7-na leh a tawpna nimina vote thlakah nizan dar 8 thlenga chhinchhiah danin vote za-a 59 a tla.
4. Manipur-a tuilianin ziaawm lam a pan.

<><><>

DRUG-FREE WALK

Nimin tuk khan Mizoram Police department huaihawtin Aizawlah ruihhlo dona kawngzawh buatsaih a ni.

Ruihhlo Do kawngzawh-ah hian Aizawl Chanmari Kawn atanga AR Ground Lammual thleng kea kalin Chief Minister Pu Lalduhoma hovin kawngzawh a ni a; Lammualah hun hmangin Chief Minister chuan chak zawka ruihhlo do a nih theih na'n sawrkar in òan a la dawn tih a sawi. Pu Lalduhoma chuan drugs vang thi naupang tak tak an tam tih sawiin ram leh hnam a tichhe nasa hle, a ti a. A bik takin mipa thi an tam tih sawiin mipa leh hmeichhe inbuk tawna chu ruihhloin a tichhe mek a, khawvela mihring dam rei zawng chhùtnaah Mizoram chu a dam rei lo ber pawl a ni mek, a ti. Mizoramin harsatna a tawh mek chu chak zawka do let a nih theih nan sawrkarin hma a la dawn tih sawiin 'Ruihhlo Do Core Committee' hmangin bul an tan, a ti a. Excise Department kutah supply tih tlem hna mawhphurhna dahin demand tih tlem lam Social Welfare kutah an dah a, fel takin hmalak dan tur an thliar tih a sawi.

Chief Minister chuan ruihhlo do kawngah Central YMA kutah an inngat thuk hle tih a sawi a. Covid inkhuahkhirhna nasa tak kalpui a nih laiin ruihhlo a tlem hle a, a ngawlvei nia hriatte'n an lo nghei thei hle tih hriat a ni tih sawiin ruihhlo chu Mizoramah tih tlem hrim hrim leh zalen tir loh chu an duh ber a ni, a ti a; sawrkar hmalakna chu thlawp turin mi tin a ngen a ni.

Home Minister Pu K. Sapdanga pawhin thu sawiin, ruihhlo chu a za-in tibo vek thei lo mah se nasa taka tih tlem a ngai, a ti a. A buaipuite tlem tham siin a nghawng a lian em em tih sawiin hnam hmelma a nih avangin theihtawpa tangruala do a pawimawh a ni, a ti.

Ruihhlo Do Kawngzawhah hian Assembly Speaker Pu Lalbiakzama bakah Minister pahnih Pu C. Lalsawivunga leh Pi Lalrinpuii te, Adviser to Chief Minister, MLA leh sawrkar mi pawimawh dang te an tel a. School 15 telin Tlawmngai pawl hrang hrang 5 leh Assam Rifles, CRPF leh BSF te an tel bawk.

<><><>

REFUGEES

Bangladesh sipai leh Kuki-Chin National Army te tharum hmanga inbeihna nghawng kal zelah Zirtawpni khan Bangladesh atanga an sahimna zawnga tlanchhia, mi 163 te'n Lawngtlai District-a Chamdur 'P' an lut.

Bangladesh, Chittagong Hills Tract-a tlangmite'n thuneihna sang zawk an ngiat vangin Bangladesh sipai leh KNA te inbeihna nghawng vang hian tun tuma raltlan Mizorama lutte hi puitling mipa 57, hmeichhia 48 bakah mipa naupang 29 leh hmeichhe naupang 29, an vaiin mi 163 an ni a; chhungkaw 41 an ni. Sahimna zawnga Lawngtlai District a lutte hi Zirtawpni chawhnu dar 2 vel khan Lawngtlai District-a Mautlang khuaah lutin, Chamdur 'P' khawtlang hruaitute'n Chamdur 'P'-ah lirtheiin an hruai a, a theih ang angin an ei tur leh riahna tur te an buaipui a. Chamdur 'P'-ah hian Bawm raltlan chhungkua 74-a mi 291 an awm mek a. Sorkar chuan thil awmdan a theih ang anga vilin a en chiang mek niin district thuneitute chuan an sawi.

<><><>

DISASTER

Cyclone Remal avanga Thawhlejni-a Aizawl district chhunga mi 34 thihna thlengah tun thlengin ruang 29 lak chhuah tawh a ni a, ruang la hmuh loh 5 a la awm.

Zitawpnia Aibawk ami Pi Vanlalruali, kum 34 ruang Hortoki bul Tlawng lui atanga lak chhuah a nih hnuah nimin khan ruang zawn hi chhunzawm leh a ni a. Chanchin thar buatsaih lai thleng hian ruang hmuh belh a la awm rih lo a. Ruang la hmuh lohte hi Melthum-ah pali leh Aibawk ami Pi Vanlalruali pasal Pu Matthew Lalchhanhima ruang te a ni. Vawiin chawhma lamah ruang zawn hna hi chhunzawm leh a nih dawn thu YMA hruaitute chuan an sawi.

Prime Minister Narendra Modi-a chuan tun hnaia Cyclone Remal avanga chhiatna thlenga nunna chan te chu Prime Minister National Relief Fund atangin Cheng Nuai 2 theuh pek an nih dawn thu a puang. He thu hi Zirtawpni khan Vantlang Auhmun kaltlanga sawiin Prime Minister chuan Mizoram bakah hmarchhak state dang - Assam, Manipur, Meghalaya leh Tripura bakah West Bengal-a Cyclone Remal tuarte zinga inhliamte zangnadawm nan Cheng Sing 5 theuh pek an ni dawn, a ti a; chhiatna thleng avanga nunna chan chhungte chu Prime Minister National Relief Fund atangin Cheng Nuai 2 theuh pek an ni dawn, a ti bawk ani.

<><><>

SEDP TEACHERS

MNF sorkar liam tain a lak, SEDP sum hmanga Education department hnuaiia zirtirtu bakah LDC leh 4th grade te chu an hun tawpin nimin atang khan an chawl ta a. School Education Minister Dr. Vanlalhlana'n SEDP zirtirtu aia tam zirtirtu lak an nih tur thu a sawi.

Dr. Vanlalhlana chuan tun dinhmunah SEDP Teacher-te chu anmahni thlaktu tur lak fel la ni chiah lo mah se nimin June ni 1 atang khan an chawl dawn tih a sawi a. Thla hmasa May ni 29 khan zirtirtu thar la tur hian exam buatsaih tawh niin, a tlingte erawh Election Model Code of Conduct a zawh hunah puan a ni ang, a ti. Education Minister sawi dan chuan SEDP Teacher chawl turte hi mi 1,100 vel an ni a, hetih lai hian zirtirtu lak thar tur hi mi 1,400 vel an ni dawn thung a. Zirtirtu ngai chhawr nawn ni dawn lo mah se zirna kawngah harsatna a awm dawn lo niin a sawi bawk.

Mizoram sorkar chuan SEDP zirtirtu thlakna tur nia ngaihin a ngeth lovin a la dawn a, kumin March ni 15 khan advertisement a ti chhuak tawh a, casual teacher hi High School atan mi 350, Middle school atan mi 371 leh Primary school atan mi 694, a vaiin mi 1,415 lak tum a ni.

School Education Minister sawi dan chuan, SEDP hnuaiia LDC leh 4th grade te pawh chawltir an ni ve dawn tho a, mahse Finance Department lamin an aiawh tur lak a la remtih loh avangin mi thar lak an ni dawn rih lo thung.

<><><>

AMC BY-POLL

Aizawl Municipal Corporation (AMC)-a bial 19-na leh Sakawrtuichhun Local Council member pakhat thlang tura vote thlak ni atan tun thla ni 25 ruat a ni.

State Election Commission chuan AMC ward 19-na leh Sakawrtuichhun Local Council member pakhat thlanna atan hian hriattirna a tichhuak a. Kulikawn, Tlangnuam, Saikhamakawn, Melthum leh Hlimen Local Council-te huam AMC ward 19-naa inthlan that a ngaihna chhan hi he ward-a thlan tlin Baryl Vanneihsangi, nikum Assembly inthlana a tlin tak hnua he ward hi a chhuahsan vang a ni a. Sakawrtuichhun Local Council member thlanna buatsaih a nih chhan chu an Local Council member pakhat a thih vang a ni.

<><><>

X-RAY MACHINE

Adviser to Chief Minister (Political) Pu Lalmuanpuia Punte chuan nimin khan Aizawl a a pisa atangin Hrangturzo bial chhunga damdawi-ina dah tur X-Ray khawl sem chhuahna hun a hmang.

Pu Lalmuanpuia Punte hian MLA fund atanga lei, Biate Community Health Centre, East Lungdar Primary Health Centre leh North Vanlaiphai Primary Health Centre te hman turin X-Ray khawl a sem chhuak a. He'ng CHC leh PHC-ah te hian hmun thenkhatah X-Ray khawl a awm lova, thenkhatah hman tlak tawh loh a awm thung a. Sem chhuahna hunah hian hriselna lam leh zirna chu a ngaih pawimawh ber a nih thu sawiin Hrangturzo

bialtu MLA chuan mipui tam thei ang berin an chhawr tur thil chu MLA fund hmanna atana a duh dan a nih thu a sawi ani.

<><><>

MARATHON LOK SABHA POLLING EXERCISE ENDS

Khawvela inthlanpui lian tham ber April ni 19 atanga tan Lok Sabha inthlana vote thlak chu zawh a ni ta.

Nimin khan Lok Sabha inthlan thawh 7-na leh a tawpna chu zawhfel a ni ta a. Ni 43 chhung zet, ram chhunga Lok Sabha bial 543 zinga bial 542-ah Lok Sabha 18-na atan inthlan a ni. Surat-ah chuah BJP candidate chu chuhtu dang awm lova thlan a ni.

Lok Sabha inthlan thawh 7-naah hian state 7 leh UT 1 chhunga Parliament bial 57-ah nimin khan vote thlak a ni a. Nizan dar 8 thlenga chhianchhiahah vote za-a 59 a tla a ni.

Inthlan thawh 7-naah hian chuhtu 904 an awm a. Chutu langzar zingah BJP hruaitu Prime Minister Narendra Modi, BJP hruaitu dang - Anurag Thakur, Ravi Shankar Prasad leh Kangana Ranaut te; Congress hruaitu Manish Tiwari leh Vikramaditya Singh te; RJD hruaitu Misa Bharti leh Trinamool Congress hruaitu Abhishek Banerjee-te an tel a ni.

Tunah hian Lok Sabha inthlana vote tlate chhiar tura inbuatsaih mek a ni a. June ni 4, Thawhlejni khian vote chhiar a ni ang.

<><><>

FLASH FLOOD SITUATION IMPROVES IN MANIPUR

Manipur-a tuilianin ziaawm lam a pan a. Tui chim chinin hmun hniam lam a pan hret hret zel.

Hetihlai hian Khwairamband Imphal Marker hmun thenkhat chu tuilian hian a la chim a, dawr leh sumdawnna hmunte chu ni 3 kalta atang khan khar a la ni.

State IFC Minister L. Sushidro chuan Imphal khawpui chhunga tuilian chu bazar hmun amite nen ni 2 lo awm tur chhung chuan thunun theih a ni tawh ang a ti a, ngai a awm leh thuai ang a ti.

Minister chuan IFC Department-in Manipur-a tui lenna hmunte an vil reng thu a sawi a. Mipuiin tui in tur an nghei lohna'n Department chuan ruahmanna a siam thu Minister chuan a sawi a. State Health Directorate chuan tuilenna hmuna mipuite chu rul tur nei laka fimkhur turin a chah a. Rul chuk an awm a nih chuan an awmna bial CMO hnena rul tur thahna damdawi lam turin an ti bawk a ni.

<><><>